

Perutusan Yang Berhormat Menteri Kebudayaan, Belia dan Sukan
Sempena Hari Keluarga Antarabangsa 2024
“International Day of Families 2024”

1. Sambutan Hari Keluarga Antarabangsa disambut pada tanggal **15 Mei** setiap tahun di seluruh dunia, selaras dengan pengiktirafan Pertubuhan Bangsa-Bangsa Bersatu (PBB) bahawa unit keluarga adalah institusi yang terpenting dalam masyarakat. Ianya **bertujuan** untuk mengukuhkan hubungan kekeluargaan dan meningkatkan lagi keupayaan keluarga dalam menghadapi cabaran serta isu-isu berkaitan dengan keluarga. Maka kita di Negara Brunei Darussalam juga turut menyambut Hari Keluarga pada setiap tahun.
2. Tema Hari Keluarga Antarabangsa pada tahun 2024 ini ialah “Keluarga dan Perubahan Iklim: Tahun Antarabangsa Keluarga + 30”. Tema ini **bertujuan untuk meningkatkan kesedaran tentang cara perubahan iklim memberi kesan kepada keluarga dan peranan yang boleh dimainkan oleh keluarga dalam tindakan iklim**. Bencana yang disebabkan oleh iklim telah memberi kesan kepada mata pencarian dan kesejahteraan keluarga serta gangguan kepada infrastruktur, ekonomi, ekosistem dan keselamatan makanan global.
3. Tema ini juga selaras dengan **Wawasan Brunei 2035, Matlamat 2: Kualiti Kehidupan Yang Tinggi**. Matlamat ini **bertujuan untuk memberikan kualiti kehidupan yang tinggi setaraf dengan negara-negara maju di dunia**. Tumpuan diberikan kepada penyediaan satu ekosistem yang holistik meliputi pelbagai aspek kehidupan seperti penyediaan kemudahan dan infrastruktur penting, keselamatan negara, **penjagaan alam sekitar** dan pemberian perlindungan sosial bagi semua lapisan masyarakat.
4. **Perubahan iklim** merujuk kepada perubahan jangka panjang dalam corak iklim bumi. Ini termasuk peningkatan suhu dan bencana akibat iklim ekstrem yang lebih kerap yang berpotensi membawa kepada penurunan produktiviti kerja dan peningkatan risiko kesihatan yang akan memberi kesan kepada keseluruhan mata pencarian masyarakat. Oleh itu, komuniti kita mesti bersedia dan dilengkapi dengan pengetahuan yang betul untuk membantu antara satu sama lain untuk mengurangkan dan menyesuaikan diri dengan kesan perubahan iklim.
5. Apabila kita selaku manusia terbiasa **menghormati** dan menjaga alam sekitar dan komponennya, secara tidak langsung kita juga sedang berusaha untuk menjaga kesejahteraan masyarakat. Maka disinilah peranan keluarga itu penting seperti pepatah “*melentur buluh biarlah dari rebungunya*”. Anak-anak kita perlu diasuh sebaik mungkin untuk sana-sama **memeduli; menyayangi** serta menjaga alam sekitar termasuk persekitaran yang bersih dan mempunyai rasa **bertanggungjawab** akan hidup berkeluarga dan bermasyarakat. Hiduplah di dalam persekitaran yang baik untuk mendapat keluarga yang sihat dan sejahtera.

6. Alhamdulillah, Negara Brunei Darussalam juga menyambut **Hari Keluarga Kebangsaan (HKK) pada setiap hari Ahad pertama dalam bulan Mei sejak tahun 2012** di peringkat negara. Pada tahun ini, sambutan bertepatan dengan sambutan Syawal mulia iaitu 25 Syawal 1445 bersamaan 5hb Mei 2024 dan telah diraikan dengan acara-acara berkebajikan termasuklah Bacaan Doa Keluarga setiap selepas sembahyang fardhu di seluruh masjid, surau dan balai ibadat dan Majlis Kesyukuran Sempena Sambutan Hari Keluarga Kebangsaan 2024 yang telah diadakan pada hari Sabtu, 4hb Mei 2024.
7. Dengan Tema “Keluargaku Harapanku”, **Fokus HKK** pada tahun ini adalah “Menerapkan Nilai-nilai Teras Kekeluargaan Brunei: **Sayang-menyayangi; Tanggungjawab; Hormat-Menghormati; Pemedulian**” (Nilai-nilai Teras Kekeluargaan Brunei: “**SaTu HaraPan**”). Fokus ini masih sangat luas dan relevan untuk digunapakai dalam **perancangan dan pengukuhan dasar** serta program pembangunan institusi keluarga senegara, dan sebagai landasan dalam **Pelan Tindakan Intitusi Keluarga** di bawah Majlis Kebangsaan Isu Sosial, yang telah dikemaskini bagi tahun 2023 hingga 2027 dan akan dilancarkan tahun ini.
8. Beberapa aktiviti dan inisiatif telahpun dirancang sepanjang tahun ini, dengan kerjasama rakan-rakan strategik sektor kerajaan dan bukan kerajaan secara senegara kearah mengukuhkan institusi keluarga dan memberikan peluang untuk kita semua meluangkan masa berkualiti bersama ahli keluarga, seperti berikut:
 - a. Festival Keluarga Harmoni;
 - b. *Big Kem Family Run* anjuran Big Kem Project Company dengan kerjasama Kementerian Kebudayaan, Belia dan Sukan melalui Jabatan Belia dan Sukan;
 - c. Mu'tamar Antarabangsa Fiqh Al-Ushrah (MUAFIQ) anjuran Kolej Universiti Perguruan Ugama Seri Begawan;
 - d. Bengkel Kemahiran Keibubapaan Islam anjuran Kolej Universiti Perguruan Ugama Seri Begawan;
 - e. Program Anakku Kesayanganku dengan kerjasama Kementerian Pendidikan dan Kementerian Hal Ehwal Ugama berbentuk aktiviti yang akan melibatkan penuntut-penuntut sekolah dari peringkat pra hingga pengajian tinggi;
 - f. Promosi Pakej Keluarga yang akan ditawarkan oleh syarikat-syarikat perniagaan yang akan juga membantu merangsang aktiviti perekonomian dalam negara.
9. Selain itu, dari sudut akademik pula, program pendidikan keluarga juga ditawarkan oleh Kolej Universiti Perguruan Ugama Seri Begawan (KUPU SB) melalui Pusat Kajian Fiqh Al-Ushrah Program Lepas Ijazah, Program Sarjana Muda dan Diploma Pengajian Fiqh Al-Ushrah seperti

Pengurusan Kewangan Keluarga Islam; Bimbingan dan Kaunseling Keluarga; dan Program Minor Pendidikan Keluarga Islam.

10. Adalah diharapkan agar semua pihak sama ada dari agensi kerajaan, swasta, persatuan-persatuan, institusi-institusi, penghulu dan ketua kampung serta pemimpin akar umbi agar terus memberikan **komitmen serta kerjasama yang bersepadu** terutama dalam **menggerakkan acara-acara sambutan** sama ada di peringkat kebangsaan, daerah, mukim atau kampung masing-masing, mahupun di peringkat organisasi, persatuan, masyarakat ataupun kumpulan keluarga masing-masing.

11. Keluarga yang stabil, bahagia, menyokong pendidikan, kesejahteraan, dan keselamatan ahli keluarga menyumbang kepada emosi, mental, dan fizikal yang sihat serta tenaga kerja yang produktif. Semua elemen ini memberi kesan positif kepada **pembangunan sosial dan ekonomi negara**. Nilai-nilai Teras Kekeluargaan Brunei yang dipupuk dalam keluarga dapat membentuk asas bagi masyarakat yang stabil dan sejahtera. Insya Allah, dengan adanya usaha dan kerjasama berterusan, dan dengan memanjatkan doa ke Hadrat Allah Subhanahu Wa Ta'ala, semoga kita akan terus maju dalam rukun damai demi Raja, Negara, Bangsa dan Ugama di bawah perlindungan Allah Subhanahu Wa Ta'ala sebagai keluarga yang hidup bahagia - negara Baldatun Tayyibatun Wa Rabbun Ghafur.

Selamat Hari Keluarga Antarabangsa 2024 kepada semua keluarga di Negara Brunei Darussalam.

“Nilai-nilai Keluarga Brunei:

Sayang-menyayangi, Tanggungjawab, Hormat-Menghormati, Pemedulian”